

# ADMINISTRACIÓN LOCAL

## PROVINCIAL

### DEPUTACIÓN PROVINCIAL

#### Subvencións e axudas

*BASES REGULADORAS DO PROGRAMA “DEPO AVENTURA A LANZADA” PARA O ANO 2017*

**EXTRACTO DO ACORDO DA XUNTA DE GOBERNO  
DA DEPUTACIÓN DE PONTEVEDRA DO 3 DE MARZO DE 2017 POLO  
QUE SE APROBAN AS BASES REGULADORAS DO PROGRAMA  
“DEPO AVENTURA A LANZADA” PARA O ANO 2017**

*BDNS(Identif.):335193*

De conformidade co previsto nos artigos 17.3.b e 20.8.a da Lei 38/2003, de 17 de novembro, xeral de subvencións, publícase o extracto da convocatoria cuxo texto completo pode consultarse na Base de Datos Nacional de Subvencións: [www.pap.minhap.gob.es/bdnstrans/index](http://www.pap.minhap.gob.es/bdnstrans/index)

#### *1. Persoas participantes*

Poderán participar nenas e nenos que cumpran os seguintes requisitos:

- Que nacesen entre 2004 e 2009 (ambos inclusive)
- Que estean empadroadas ou empadroados na provincia de Pontevedra
- Que non padezan enfermidade infecto-contaxiosa en fase activa

Poderán participar menores en situación de tutela ou garda pola Administración, que se atopen en acollemento residencial nun centro da provincia de Pontevedra.

No caso de menores que precisen un apoio específico derivado dalgún tipo de diversidade funcional ou doutra patoloxía, esta circunstancia deberá facerse constar no cuestionario de saúde e autonomía persoal, detallando do xeito máis preciso posible as súas necesidades específicas.

#### *2. Obxecto*

A institución provincial, co obxecto de promover e fomentar o desenvolvemento persoal e social das rapazas e rapaces, e favorecer a comunicación e o dinamismo multicultural, organiza o programa “Depo Aventura A Lanzada” 2017 e oferta 2.200 prazas nos campamentos de verán a menores da provincia de Pontevedra.

Este programa lúdico e educativo inclúe a programación e o desenvolvemento de actividades ao aire libre relacionadas coa natureza, artísticas, culturais, deportivas e xogos, entre outras, e introduce por primeira vez actividades en lingua inglesa, co fin de colaborar na formación das nosas mozas e mozos.

### 3. Bases reguladoras

Bases reguladoras aprobadas por acordo da Xunta de Goberno da Deputación de Pontevedra do 3 de marzo de 2017; Lei 38/2003, de 17 de novembro, xeral de subvencións; Real decreto 887/2006, de 21 de xullo, polo que se aproba o Regulamento da Lei xeral de subvencións; Lei 7/1985, de 2 de abril, reguladora das bases do réxime local; Real decreto legislativo 2/2004, de 5 de marzo, polo que se aproba o Texto refundido da Lei reguladora das facendas locais; Lei 5/1997, de 22 de xullo, de Administración local de Galicia; Lei 39/2015, de 1 de outubro, do procedemento administrativo común das administracións públicas; Lei 40/2015, de 1 de outubro, de réxime xurídico do sector público; Real decreto legislativo 3/2011, de 14 de novembro, polo que se aproba o Texto refundido da Lei de contratos do sector público; Real decreto legislativo 1/2013, de 29 de novembro, polo que se aproba o Texto refundido da Lei xeral de dereitos das persoas con discapacidade e da súa inclusión social; Bases de execución do vixente Orzamento provincial

### 4. Contía

A contía máxima dispoñible para levar a cabo o programa “Depo Aventura A Lanzada” para o ano 2017 é de douscentos corenta mil (240.000,00) euros.

### 5. Prazo de presentación

Será de 20 días naturais contados a partir da publicación do extracto desta convocatoria no Boletín Oficial da Provincia de Pontevedra (BOPPO).

### 6. Outros datos de interese

“Depo Aventura” 2017 desenvolverase, entre os meses de xuño e setembro, a través de 11 quendas de campamentos de 7 días de duración cada unha.

Número de prazas: o número total de prazas ofertadas para este programa ascende a 2.200, distribuídas do seguinte xeito:

- 1.900 prazas que serán adxudicadas polo procedemento xeral
- 300 prazas que serán adxudicadas polo procedemento específico: prazas de reserva para menores en situación ou risco de exclusión social, repartidas do seguinte xeito:

- 260 prazas de reserva para menores en situación ou risco de exclusión social dos concellos da provincia de Pontevedra
- 25 prazas de reserva asignadas a menores do Centro Príncipe Felipe dependente da Deputación de Pontevedra
- 15 prazas para menores en situación de tutela ou garda administrativa doutros centros da provincia de Pontevedra

Forma de presentación de solicitudes: co fin de minimizar erros e axilizar a mecanización dos datos das solicitudes deberase escoller preferentemente a opción de presentación de solicitudes mediante o formulario web ao que se pode acceder en [www.depo.es](http://www.depo.es).

- A institución provincial ofertará a xestión dos campamentos a través dunha empresa especializada na materia, responsable da execución, coordinación e avaliación do programa
- O procedemento de adxudicación de prazas será a través de sorteo público. No caso de que o número de solicitudes exceda o número de prazas ofertadas, desde a Deputación elaborárase a lista seguindo a orde de prelación que se detalla na base quinta
- Cada persoa poderá presentar unha solicitude, no modelo normalizado e coa documentación establecida na base sétima

Prezo: a Deputación subvenciona polo procedemento xeral o 50 % do custo da praza.

O importe do pagamento final que deberá efectuar a persoa interesada é de:

- 100 euros por praza
- 80 euros por praza para menores de familias numerosas (desconto do 20 % sobre o prezo)

Estes prezos inclúen todos os servizos do campamento, incluída a excursión ao exterior.

Co fin de acadar a igualdade de oportunidades a institución provincial subvencionará o 100 % do prezo da praza para promover a inclusión social das nenas e nenos da provincia de Pontevedra.

Pontevedra, 09/03/2017.—A presidenta, M.<sup>a</sup> del Carmen Silva Rego.